



BKZ DŽEMAT
S A L Z B U R G

BOSNIAKISCHES KULTURZENTRUM
BKZ- DŽEMAT SALZBURG
BOSNJACKI KULTURNI CENTAR - DŽEMAT SALZBURG
ZVR-Zahl 568006972
Gabelsbergerstraße 34
5020 Salzburg
Tel. +43 (0) 650 570 2085
E-Mail: info@dzemat-salzburg.at

IZVJEŠTAJ O AKTIVNOSTIMA VEZANIM ZA KUPOVINU NOVIH DŽEMATSKIH PROSTORIJA

Poštovane džematlije,

Esselamu alejkum ve rahmetullahi ve berekatuhu,

Kako bismo vas upoznali sa trenutnim stanjem i budućim pravcima djelovanja u vezi sa projektom nove džamije i Bošnjačkog centra, želimo na početku izdvojiti nekoliko ključnih zaključaka:

- Džemat trenutno raspolaže sa približno **1,6 miliona eura vlastitog kapitala**, uključujući prikupljena sredstva i postojeću imovinu.
- Dosadašnja akcija prikupljanja sredstava pokazala je dobar odziv, ali i granice naših trenutnih finansijskih mogućnosti.
- Projekti vrijedni **4 do 5 miliona eura**, poput objekta u Magazinstrasse, trenutno nisu realno ostvarivi bez značajno većih izvora finansiranja.
- Dodatna pomoć drugih džemata u Austriji i Evropi može biti značajna, ali neće bitno promijeniti ukupni finansijski okvir.
- Smatramo da je najrealniji put ka ostvarenju cilja **kupovina postojećeg objekta u vrijednosti od približno 2 do 2,5 miliona eura**, uz dodatna sredstva za adaptaciju i prilagodbu.
- Kupovina građevinske parcele i izgradnja novog objekta od temelja trenutno predstavljaju prevelik finansijski i administrativni rizik.
- Potreba za novim prostorijama postaje sve izraženija zbog stalnog rasta džemata, povećanja broja djece u mektebu i popunjenosti postojećih kapaciteta.
- Za uspješnu realizaciju projekta neophodna je veća uključenost svih džematlija i nastavak podrške akciji prikupljanja sredstava.

Dosadašnje aktivnosti i finansijski okvir

U proteklom periodu intenzivno smo radili na pronalaženju trajnog i adekvatnog rješenja za potrebe našeg džemata kroz kupovinu novih prostorija i formiranje Bošnjačkog Islamskog kulturnog centra u Salzburgu.

Naš prvi ozbiljniji pokušaj novijeg datuma bio je vezan za parcelu „Hofer“, čija je vrijednost iznosila približno 12 miliona eura. Iako je od samog početka bilo jasno da se radi o projektu koji značajno nadilazi naše mogućnosti, taj pokušaj je pokazao razmjere potreba i ambicija našeg džemata.

Prije nešto više od godinu dana pokrenuli smo akciju prikupljanja sredstava za buduću Bošnjački Islamski centar, ne vežući sredstva za konkretan objekat. Na redovnoj godišnjoj skupštini predstavili smo objekat u Magazinstrasse, u kojem je skupština i održana, sa procijenjenom vrijednošću od 4,5 miliona eura.

Od početka akcije do danas na posebnom računu za Islamski centar prikupljeno je nešto više od **900.000 eura**. Pored toga, postojeće džamijske prostorije vrijede između **350.000 i 400.000 eura**, dok vrijednost džematskog stana iznosi približno **300.000 eura**. Ukupno gledano, džemat trenutno raspolaže kapitalom od oko **1,6 miliona eura**.

Analiza i realne mogućnosti

Akciji se do sada odazvalo oko **350 džematlija**, odnosno nešto više od polovine aktivnih članova džemata. Zahvalni smo svima koji su podržali projekat, ali analiza uplata pokazuje da smo najvećim dijelom iscrpili potencijal dosadašnjih donatora. Bez aktiviranja većeg broja džematlija koji do sada nisu učestvovali teško je očekivati značajnije povećanje prikupljenih sredstava.



BKZ DŽEMAT
S A L Z B U R G

BOSNIAKISCHES KULTURZENTRUM
BKZ- DŽEMAT SALZBURG
BOSNJACKI KULTURNI CENTAR - DŽEMAT SALZBURG
ZVR-Zahl 568006972
Gabelsbergerstraße 34
5020 Salzburg
Tel. +43 (0) 650 570 2085
E-Mail: info@dzemat-salzburg.at

Kada je riječ o pomoći drugih džemata u Austriji i Evropi, realno možemo računati na podršku između **150.000 i 200.000 eura**. Iako je takva pomoć veoma vrijedna, ona nije dovoljna za realizaciju projekata iz višeg cjenovnog ranga.

Zbog toga smatramo da je potrebno prilagoditi naše planove realnim mogućnostima. Umjesto projekata vrijednih četiri ili više miliona eura, fokus treba usmjeriti na objekte čija se kupovna cijena kreće između **2 i 2,5 miliona eura**, uz dodatnih do **500.000 eura** za adaptaciju, sanaciju i prilagodbu.

Smatramo da je najrealnija i najodgovornija opcija kupovina već postojećeg objekta koji bismo kroz potrebne adaptacije i prilagodbe osposobili za potrebe našeg džemata i budućeg Bošnjačkog Islamskog centra. Na taj način možemo ostati u okviru svojih mogućnosti, izbjeći dugotrajne procedure i značajno ubrzati realizaciju projekta.

Procjenjujemo da je maksimalni finansijski okvir koji možemo ostvariti, uz postojeća sredstva, našu imovinu, očekivanu pomoć sa strane i nastavak podrške džematlija, između **2,5 i 3 miliona eura** za kompletnu realizaciju projekta.

Zašto ne gradnja od temelja?

Važno je naglasiti da kupovina građevinske parcele i izgradnja objekta od temelja trenutno predstavljaju veoma teško izvodivu opciju.

Takav projekat zahtijevao bi značajno veća sredstva, a nosio bi i ozbiljne rizike vezane za urbanističke planove, dozvole i odobrenja gradskih vlasti. Kupovina zemljišta sama po sebi ne garantuje da će na toj lokaciji biti moguće realizovati objekat koji odgovara potrebama našeg džemata. Pored toga, izrada projektne dokumentacije, pribavljanje dozvola i sam proces gradnje zahtijevaju mnogo vremena i dodatnih finansijskih sredstava.

Poziv na zajedničku odgovornost

Broj djece u mektebu iz godine u godinu raste, termini na džuma-namazu su uglavnom popunjeni, a postojeći kapaciteti postaju nedostatni za potrebe džemata koji kontinuirano raste. Potreba za novim prostorijama više nije pitanje želje, nego stvarna potreba naše zajednice.

Zbog toga vas pozivamo da se aktivno uključite u ovaj proces svojim prijedlozima, informacijama, kontaktima i podrškom kako bismo zajedno pronašli najbolje rješenje. Istovremeno vas molimo za razumijevanje, jer nosimo veliku odgovornost prema svakom euru koji je povjeren ovom projektu.

Nastavimo zajedno raditi na ovom generacijskom projektu sa još većim interesom, odgovornošću i povjerenjem u Allahovu pomoć, kako bismo što prije osigurali adekvatne prostorije za potrebe sadašnjih i budućih generacija našeg džemata.

Molimo Uzvišenog Allaha da nam podari bereket, jedinstvo i uspjeh u ovom hairli projektu, te da nas osnaži voljom i sredstvima kako bismo uskoro uselili u prostorije našeg budućeg Islamskog centra.

Esselamu alejkum ve rahmetullahi ve berekatuhu.
Vaš Odbor BKZ Salzburg

Predsjednik:

Ing. Said Muratović, Msc.



Salzburg 19.06.2025.